



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Ven. Viri Thomæ Malleoli A Kempis, Canonici Regvlaris
Ordinis D. Avgvstini. Opera Omnia**

Thomas <von Kempen>

Dvaci, 1625

Oratio V. Oratio de eximijs virtutibus beatæ Ioannis Baptistæ.

[urn:nbn:de:hbz:466:1-45790](https://nbn-resolving.org/urn:nbn:de:hbz:466:1-45790)

tem & singularem confidentiam, quam ad te gero, tibi reuelavi causam meam, & amodo tutius reuelabo. Sentio enim de te exire virtutem magnam; & memoriale nominis tui, solatium fore animæ meæ. O dulcissimum nomen Mariæ, nomen vnctionis & gratiæ semper cogitandum, semper nominandum & venerandum. O nomen calicum, & verè angelicum: quod ore Euangelistæ constat fidelibus piè commendatum: Et nomen, inquit, virginis Maria. O sacratissima & omni laude dignissima Maria: Tu porta cæli: tu ianua vitæ: tu templum Dei: tu sacrarium Spiritus sancti. Quicquid igitur pulchritudinis & amœnitatis, in creaturis cerno: quicquid magnum & virtuosum in sanctis Dei confidero, totum tuæ generosæ celsitudini aptare desidero. Quia dignum est, vt me cum omnibus creaturis, ad tuam perpetuam laudationem transferam, quam in specialem matrem, ac fidelissimam aduocatam mihi elegi nunc, & post hanc vitam, ad benedicti filij tui Iesu Christi gloriam promerendam. Amen.

ORATIO V.

Oratio de eximijs virtutibus beatae Ioannis Baptista.

1. O Sanctissime & præclarissime Ioannes Baptista, specialis amicus Iesu Christi, fidelissime præco Dei, & acceptabilis præcursor Domini. O summe venerande & semper amande patrone, magnus & excelsus in latitudine terræ, sed maior in altitudine cæli, vbi nunc inter summos Sanctos luce clariori præfulges, & honore speciali. Tu namque omnium prophetarum eximius vates, priores patriarchas & prophetas ortu temporis secutus es, sed virtutum iubare & meritorum gloria præcessisti. Siquidem velut cælestis quidam Lucifer, à Deo missus in mundum, & æterni regis nostri aduentum, solemque iustitiæ in tenebris exortum, actibus mirabilibus & verbis fide dignis prænuntiasti. Tu ab Angelo Gabriele, in templo Dei annunciatus es. Tu in vtero sanctificatus. Tu Spiritu sancto repletus, & ad vocem loquentis genitricis Dei Mariæ, in vtero materno exultasti. Tu puer, propheta altissimi vocatus es: & muto patri, loquelam diu amissam, sacri nominis tui editione reddidisti. Tu itaque mirabiliter natus, sed multo sanctius es conuersatus. Tu paterna domo, & omni parentela relicta, puer adhuc septennis eremum intrasti: vbi humano solatio destitutus, angelicam vitam vsque ad diem ostensionis suæ in Israel, solitarius exegisti. Tu asperum iter aggressus, vili contentus cibo, & duro accinctus indumento, delicias regum & diuitem molliciem strenuè de-

declinasti. Tu spiritu sancto inspirante, ad ostendendam populo viam perpetuæ salutis, ad agendam poenitentiam, & regnum cælorum consequendum, multa exhortatione euangelizans verbum Dei, fortiter prædicasti. Tu agnum Dei venturum, turbis prædixisti, & quem cæteri ab initio prophetæ verbis, signis, vita, moribus, ac magnis desiderijs, diu præfati sunt; tu fidelissime serue Dei, ac solemniter præcursor, Christum in carne iam præsentem, digito demonstraisti, dicens: Ecce agnus Dei, ecce qui tollit peccata mundi. Hic est enim, de quo dixi: Tu venientem ad baptismum tuum, Iesum Dei filium tuis sanctissimis manibus, ô venerabilis Baptista, in clypeo Ioannes, summa vt decuit cum reuerentia & tremore, in Iordane baptizasti. Tu patris vocem de sublimi sonantem audisti, Hic est filius meus dilectus, in quo mihi bene complacui. Tu Spiritum sanctum in columbæ specie, super Dominum Salvatorem descendentem ac manentem, beatis oculis contempsisti. Tu summæ Trinitatis ineffabile mysterium, superna reuelatione didicisti: atq; Christo Iesu Domino nostro, indubitabile testimonium perhibuisti; quia hic est filius Dei. Sed & Iesus rursus, tam magnificum tuæ sanctitati testimonium reddidit: quale sanctorum aliquis audire, in hac mortalitatis luce, non meruit. Inter natos mulierum, inquit, maior Ioanne Baptista nemo surrexit.

2. O signifer martyrum honorande Ioannes: Tu zelo iustitiæ & amore castitatis efferuens, impijssimi Herodis regis incestum detestabilem, voce imperterrita obiurgasti. Et pro constantia veritatis, tetrum carcerem & dura vincula patienter subiisti: ac demum, ad petitionem mulierum turpissimarum, sanguinem tuum furiosè sitientium, benedictum caput tuum ab infantia Deo consecratum, gladio speculatoris amputandum spontaneus tradidisti. Sicque sanguine proprio purpuratus, & martyrij palma dignus effectus; quasi lampas mundi ardentissima, ad limbum sanctorum Patrum serenus descendisti. Quibus tunc nouum exultationis gaudium intulisti, dum ipsum humani generis redemptorem, in proximo aduentare, pro eruendis ex ore inferni electis, prænuntiares: quem profecto nascendo, baptizando, prædicando, ostendendo, ac moriendo, vt boni nuntij baiulus, in mundo prius præcurasti. O sublimissime virorum sanctorum, quomodo te magnificem & prædicem, penitus ignoro. Ita diuitem enim & magnum in omni gratia sanctitatis te inuenio, vt in omni choro sanctorum, singulariter splendidum ac decoratum gloria conspiciam. Imò nec præ splendore excellentis gloriæ tuæ, satis iam queo te conspiciari: sed neque ad plenum tuam dignitatem admirari sufficio. Vbi que enim nomen tuum volitat:

& in omni Ecclesia, laus sancti Ioannis Baptistæ excellenter claret. Si inter Angelos te quæsero, Ioannes par Angelis, & socius Angelorum, atque homine maior rectè prædicatur. Si inter Prophetas, etiam plus quàm Propheta, Christo teste, diceris. Si inter Apostolos, Apostolorum vox & euangelij primicerius dignissimè nominaris. Si inter martyres, tu fortissimus athleta martyrum nobiliter decantaris. Si inter Confessores & Doctores, tu almus Christi confessor ac doctor præclarus iure appellaris. Si inter virgines, tu virgo purissimus, virginis legatus & cognatus, legitime comprobaris. Si inter monachos & eremitas, tu deuotus eremicultor, ac monachorum sanctus institutor demonstraris. Si inter innocentes & puros, innocentiior & purior homo tibi similis non est inuentus. Si inter pœnitentes & abstinentes, tu cunctos primos austeritate vitæ & sinceritate conscientie præcedis.

3. O virum sanctissimum, super omnes & in omnibus laudabilem, Deo charissimum, Angelis acceptabilem, & hominibus valde amabilem. O ardens & lucens lucerna omnipotentis Dei, terram illuminans, cælum lætificans, peccatores conuertens, iustos conseruans, lapsos erigens, stantes roborans, omnesque pariter ad Deum trahens, atque in cæleste regnum perducere affectans, Esto (quæso) pie memor mei, & tuis sanctis precibus apud districtum iudicem, omnium peccatorum mihi indulgentiam impetra: atque virtutum germina in me satage plantare: quatenus liberatus à vitijs omnibus, Spiritus sancti vnctione efficiar dignus, atque post huius mundi varia discrimina, ad perpetuam beatitudinis portum, te suffragante, merear saluus peruenire. Subueni mihi precor obnixè, columna præsidij cælestis, in hora mortis imminenti, & pro salute indigentis seruuli tui, verbum bonum & placabile, apud regem Angelorum potissimè amicorum eius, loquere confidenter. Vt quem propriæ actionis pondus maxime grauat & perterret, tuæ sanctissimæ orationis scutum ab hostium insultatione defendat: & per tua gloriosa merita, anima mea de carcere carnis egressura, occurrentibus beatis Angelorum choris, ad æternum cæli palatium feliciter ac securè transire mereatur. Amen.

ORATIO VI.

Oratio de privilegijs præcipui amoris beati Ioannis Euangelista.

X. **A** Ve dulcissime Ioannes apostole. Ave sanctorum Euangelistarum altissime. Ave sancte Marię matris Iesu custos fidelissime. Saluto te deuotis animi mei obsequijs. Honorifico te extotis cordis mei præcordijs. Inuoco te affectuosis precibus & suis spiritijs.